




Outrasvozes

REVISTA **G**ALEGA PARA A **S**SOLIDARIEDADE, dezembro 93, Nº 2 - 3

P.V.P. 250 ptas.



O Kurdistan desde Europa: A hipocresía da C.E.

Mentres os países europeos, con Alemaña á cabeza, proporcionan armas a Turquía para que esta poda continuar co xenocidio dos kurdos, o Parlamento Europeo mostra a súa hipócrita preocupación polos dereitos humanos en Turquía, nunha das dúas resolucións que sobre o tema apareceron o 15 de xullo. Mas as súas críticas do goberno turco son tan veladas que case non se sinten. O que si se sente é a condena do "terrorismo" do PKK, na segunda resolución que publicamos a continuación. Por "terrorismo" queren dicir as protestas dos kurdos que viven en Europa contra as masacres no Kurdistan.

A esclarecedora resposta de Lord Avebury (presidente do Grupo Parlamentario Británico de Dereitos Humanos) ante o mesmo Parlamento Europeo, non necesita comentario.

MOCION PARA UNHA RESOLUCION

coa solicitude de inclusión no debate sobre temas tópicos e urxentes de maior importancia segundo a Norma 64 das Normas de Procedimento dos Srs. Bertens, Nordmann e Maher do grupo LDR sobre a declaración do PKK a favor do terrorismo en Turquía.

O PARLAMENTO EUROPEU

- A. Consciente dos miles de mortes e da miséria causadas en Turquía pola violencia terrorista e a súa represión, e o perigo que isto representa para a democracia turca;
- B. Sabendo que despois do anuncio do cesamento do fogo polo PKK en marzo, o goberno turco ofreceu unha amnistía a todo militante do PKK que renunciase á violencia;
- C. Consciente de que a pesar destas ofertas, as matanzas continuaron, culminando na masacre polo PKK de 31 soldados desarmados e catro civís o 24 de maio;
- D. Deplorando a declaración que o Sr. Abdullah Ocalan fixo no Líbano o 8 de xuño a favor da reanudación da violencia contra os turcos, coa cal, nas súas palabras, "miles, decenas de miles sufrirán. Esta campaña será a máis violenta de todas as nosas campañas";
- E. Sinalando que a vítimas principais desta nova onda de terrorismo serán con probabilidade os turcos kurdos que non seguen a política de terror do PKK;
- F. Enfatizando o interese do goberno turco en non levar moitos dos seis millóns de turcos kurdos aos brazos do PKK;
- G. Tendo en conta as resolucións anteriores sobre a violación de dereitos humanos en Turquía:
 - 1. Condena a campaña terrorista do PKK e recoñece o deber das autoridades turcas de combaté-la;
 - 2. Fai un chamamento ao goberno turco para que lles insista ao exército e á policía que respeten os dereitos humanos de todos os cidadáns e aprécia o progreso feito neste sentido;
 - 3. Insta ao goberno turco a que recoñeza o dereito dos turcos kurdos á autonomía cultural e especialmente ao uso do seu propio idioma;
 - 4. Aproba o valente rechazo de moitos turcos kurdos e dos líderes dos kurdos iraquianos, elixidos democraticamente, a apoiar o PKK;
 - 5. Pide ao seu Presidente que transmita esta resolución á Comisión, o Consello, os Ministros, o Goberno e a Asemblea Nacional de Turquía e a Asemblea Nacional do Kurdistan (Iraq).

(Moción 03-1023, 1026, 1061 e 1081/93, 15 xullo 1993)

RESPOSTA DE LORD AVEBURY

Ao Secretário, Grupo Democrático Liberal e Reformista (LDR), Parlamento Europeu.

Estimados colegas:

Mostraron-me unha cópia dunha resolución presentada polos Sres. Bertens, Nordmann e Maher, sobre a "declaración do PKK a favor do terrorismo en Turquía". Permitan-me suxerir-lles que reconsideren os termos desta moción, que dá unha imaxe falsa e tendenciosa de acontecementos recentes.

Desde 1984, houbo miles de mortes, como afirma o parágrafo A, mas a gran maioría destas foron provocadas polo uso de poder militar contra obxectivos civís polas forzas armadas turcas. Estiven na zona kurda de Turquía o primeiro de abril do ano pasado, xusto despois das masacres do Newroz; ali coñecín familiares de civís desarmados que foran mortos na rua, e visitei xente no hospital onde se recuperaban de feridas de bala, e outras feridas graves causadas polo exército. Tamén nos entrevistamos con familiares de xente que torturaran até matá-los.

En setembro, regresei e unha vez mais recollín abundantes provas das atrocidades das forzas armadas turcas. Estiven co persoal dun xornal que foi o que mais asasinatos de xornalistas sofreu, 12 deles morreron só en 1992. Estou seguro de que vocês coñecen estes feitos, aos que organizacións como Amnistía Internacional, Helsinki Watch ou Artigo 19 lle dieron ampla publicidade.

En canto ao parágrafo B, o goberno turco non emitiu nengunha resposta política ao cesamento do fogo anunciado polo PKK. Escrebin-lle a Demirel [presidente de Turquía] dúas veces, rogando-lle que recibera a representantes do pobo kurdo para debater unha solución negociada, e o mesmo lle repetín persoalmente cando se dirixiu á Gran Sala do Comité en decembro pasado. Non contestou as miñas cartas, e na reunión no Comité contentou-se con dicir que "nunca negociaremos con terroristas". Intentei interrompé-lo para dicir que eu me refería ao HEP [Partido Laborista Popular, que o Tribunal para a Seguridade do Estado prohibirá con toda seguridade proximamente], mas el non quixo escoitar, e cando o obriguei a escoitar unha vez mais despois da reunión para dicir-lle que debería

permitir discutir libremente un status político alternativo para a zona kurda, dixo-me que eu non entendía a situación.

No parágrafo C, vocês seleccionan un incidente que aconteceu o 24 de maio, pasando por alto dúzias de outras matanzas que aconteceron durante o cesamento do fogo, a imensa maioría delas perpetradas por membros das forzas armadas.

Por que din, no parágrafo E, que as principais vítimas "desta nova onda de terrorismo" serán con probabilidade os "turcos kurdos" que non seguen a política de terror do PKK? A estraña expresión "turcos kurdos" está sobrecargada de prexuízos, e non se debería empregar, a menos que vocês queiran enfrentar deliberadamente a todo o pobo kurdo. Se se molestán en falar coa xente das zonas kurdas, como eu fixen dúas veces, descubrirán que a imensa maioría deles está en contra da opresión turca e a favor de algunha forma de auto-governo.

A razón pola que moitos kurdos decidiron tomar parte na loita armada é que se lles tiñan negado todas as vías constitucionais para expresarse. Como

Con 30 millóns de persoas, os kurdos son o pobo máis grande do mundo que non ten control sobre os seus propios asuntos políticos

deberían saber, castiga-se coa pena de morte facer ou dicir algo que socave a "indivisíbel integridade do estado turco", e isto impide non só a defensa de un estado kurdo, senón tamén a promoción do autogoberno ou autonomía rexional. Os debates que temos nos nosos países sobre os dereitos dos flamencos, os bascos, os lombardos, os bávaros ou os escoceses serían todos ilegais se as nosas constituíções estiveran feitas co mesmo modelo que a

turca. Polo tanto, non é o deber das autoridades turcas "combater" a "campaña terrorista do PKK" (parágrafo 1), senón retirar os obstáculos que impiden a liberdade de expresión ou de reunión, o que induce a



Castiga-se coa pena de morte facer ou dicir algo que socave a "indivisíbel integridade do estado turco", e isto impide non só a defensa dun estado kurdo, senón tamén a promoción do autogoberno ou autonomía rexional

A miña impresión -afirma Lord Avebury- é que o PKK [Partido dos Traballadores Kurdos] ten o apoio das masas; eles lideran (asi o considera a xente) a loita contra a "dominación colonial e estranxeira", aínda cando iso implique o sufrimento de moitos. Para que entendan este sentimento, consideren o apoio á campaña de boicot do ANC en Sudáfrica; consideren o apoio das masas á Frente de Liberación Popular de Eritrea, que gañou recentemente unha guerra de liberación que durou 31 anos; consideren a *intifada* de Cachemira, ou consideren a resistencia dos monxes e monxas tibetanos contra a opresión chinesa. Todas estas manifestacións da vontade do pobo para afirmar a súa identidade nacional trouxeron consigo moito sufrimento, mas aqueles que estaban na fronte de loita tiveron o apoio popular de case todo o mundo, en todos os casos.

moitos a utilizar a forza na súa desesperación.

Vocés ou son inxénuos ou nécios cando lle piden ao goberno turco que insista en que a policía e o exército respeten os dereitos humanos de todos os cidadáns, e simplemente non podo imaxinar que é o que lles fai crer que se fixo algun progreso nese aspecto. As forzas armadas turcas lanzaron-se a unha grandiosa ofensiva na zona kurda, onde bombardean e despóvoan aldeas inteiras, matando un número de civís maior do que até agora tiñan feito.

Por que din, no parágrafo 3, que os kurdos teñen dereito só á autonomía cultural? Ao final da primeira guerra mundial, o presidente Woodrow Wilson e os aliados occidentais prometeran un plebiscito aos kurdos, que son o pobo mais grande do mundo (30 millóns de persoas) que non ten control sobre os seus propios asuntos políticos, en contra da Carta da ONU e dos Convénios Internacionais sobre Dereitos Civís, Políticos, Sociais e Económicos. Con que autoridade vocês deciden que este pobo en particular pode desfrutar de dereitos culturais e non políticos?

A situación dos kurdos iraquianos é difícil, e comprendo que non estexan dispostos a meter-se en pleitos con Ankara. Non é unha cuestión de valentía, senón de mero egoísmo. Teñen un poderoso inimigo no sul, decidido a exteminá-los en calquer momento, e sería un erro moi grande pola súa parte o dar-lle aos turcos a mínima excusa para que os ataquen polo norte. Os ministros de exteriores de Turquía, Siria e Irán reuníronse varias veces recentemente, a mais recente o 7 de xuño, en Teerán. O tema principal a discutir era a autonomía dos kurdos iraquianos, que eles percibían como unha ameaza, e o vian indubidablemente como un desafortunado exemplo para os kurdos dos seus propios territorios. A súa resolución pasa por alto descaradamente a ameaza de xenocidio por parte deste atroz trio de opresores de kurdos en cada estado, e deberían ter-se dado conta que xa comezou unha ofensiva contra os kurdos tanto iranianos como turcos.

Por último, permitan-me que lles suxira que retiren a moción da lista de asuntos a tratar do parlamento europeu até que teñan a oportunidade de informar-se con mais detalle sobre as realidades do problema kurdo, en primeiro lugar.

Sentirei-me satisfeito de enviar-lles cópias dos informes das miñas dúas misións do ano pasado, e outros documentos publicados por ONGs como Amnistía Internacional, xa mencionada, en caso de que os seus membros queiran cópias. ■

Guerrilleiras
kurdas



Rubar Rizgar

O 12 de outubro de 1993, o **COSAL** entrevistou, en Londres, a **Rubar Rizgar**, representante para o Reino Unido da **Frente de Liberación Nacional do Kurdistan (ERNK)**, da que forma parte o **Partido dos Traballadores Kurdos (PKK)**.

O PKK fundou-se no 1978, e comezou a loita armada no 1984. Cal era a situación, tanto no Kurdistan como no interior do partido, durante estes anos, e cais foron as razóns que impulsaron ao PKK a tomar as armas?

Ao principio, cando se fundou o PKK, a situación no Kurdistan era tal que apenas quedaba nada da nosa cultura. O estado turco destruíra case por completo a nosa identidade, de xeito que o PKK tivo que empezar desde o principio, entrando en contacto coa xente, conciencianzo-a. Desde a creación do PKK, ilegal desde un principio, o estado turco intentou destruír o partido. Este tivo que recorrer ás armas para defender-se. O goberno turco, aínda que daquela era un goberno civil, estaba dominado polo exército, un exército poderoso que, sen estar no poder, gobernaba desde atrás. En 1980 os militares levaron a cabo un golpe de estado, para poder reprimir mellor á poboación kurda organizada.

Desde esa data, arredor de 5000 membros e simpatizantes do PKK foron encarcerados, coa intención de destruír o partido. No cárcere, a resistencia continuaba: no ano 1982, un prisioneiro kurdo, militante do PKK,

celebrou o Newroz [ano novo kurdo, símbolo da resistencia] na prisión; foi asasinado. Catro militantes prenderon-se lume a si mesmos, en protesta pola súa situación, e outros tantos iniciaron unha folga de fame até a morte, o 14 de xullo de 1982. Ante esta situación, o PKK decidira retirar as súas forzas a Oriente Medio, fóra das fronteiras turcas, para re-agrupar-se. Mas no segundo congreso do partido, tomou-se a decisión de regresar ao noroeste do Kurdistan [a rexión kurda baixo dominio turco]. Como non había posibilidade de levar a cabo calquer actividade política, enviáronse unidades de propaganda para preparar o terreo para a loita armada. Estas unidades de propaganda serían a base da futura loita guerrilleira. Ao ser o Kurdistan unha colonia, ocupada por forzas coloniais, existe unha violencia colonial. Era necesario contrarrestala cunha forza e cunha violencia revolucionarias. Deste xeito, en 1984, empezou "oficialmente" a loita armada.

Cal consideras que é, obxectivamente, o futuro da vosa loita, despois do colapso dos países socialistas, e da imposición da nova orde mundial? Existe unha verdadeira posibilidade de insurrección no Kurdistan?

SÓ A ACTIVIDADE GUERRILLEIRA FARÁ QUE O ESTADO TURCO CONSIDERE UNHA SOLUCIÓN POLÍTICA AO CONFLITO KURDO

No pasado, o PKK nunca dependeu de nen tivo lazos con os países socialistas; nen cos países do bloque capitalista. Nunca recibeu nengun apoio, era unha organización independente, dependendo só da súa propia xente e simpatizantes. Polo tanto, o



colapso dos países socialistas non tivo nengun efecto negativo no noso movemento. Nós inclusive tiñamos criticado moito o sistema socialista, tal como se levara á práctica nestes países.

En canto á segunda pregunta, a loita no Kurdistan adoptou a forma de guerra popular de desgaste a longo prazo. O único tipo de isurreizón que se dá, é nos funerais de guerrilleiros ou simpatizantes, ou nas celebracións do Newroz. Nestes casos temos mostras públicas de apoio. Este tipo de protestas continuarán e se intensificarán no futuro.

Existe algun choque entre a práctica revolucionaria e un pobo cunha cultura tradicional maioritariamente islámica? Cal é a situación da muller, nunha guerrilla na que un tercio dos seus efectivos son mulleres?

O labor da guerrilla non é só atacar obxectivos, senón tamén politizar a xente, concienciá-los de que se

está a loitar polo seu país. É todo un proxecto educativo. Temos que gañarnos a xente. O movemento de liberación é a súa garantía. A poboación apoia a guerrilla. Non existe tal choque.

A liberación da sociedade vai unida á liberación das mulleres nesa sociedade. Existen publicacións de mulleres [como a revista *Jina Serbilind*] nas que se analiza o tema. Debido ao labor educativo levado a cabo polo PKK, a liberación das mulleres non provoca nengun choque. A xente dáse conta da importancia das mulleres á hora de liberar a sociedade, polo seu compromiso e porque elas mesmas son mais radicais que os homes. Unha revolución non se fai só cos homes. Esta é a razón do éxito do PKK á hora de gañar-se ás mulleres.

O 17 de marzo de 1993, o PKK iniciou un cesamento do fogo unilateral, en parte para evitar unha nova masacre na celebración do Newroz, o ano novo kurdo. O 17 de abril, o PKK estendeu o cesamento do fogo indefi-

A instrución militar das mulleres: dúas veces ao día as guerrilleiras do PKK forman as súas filas nos campamentos de montaña do norte de Iraq, ao outro lado da fronteira de Turquía

nidamente, sempre que se cumpriran certas condicións (detención das operacións militares turcas, recoñecemento constitucional do Kurdistan, volta dos refuxiados, etc). Durante este tempo, o exército destruíu unhas 44 aldeas, asasinou a 165 persoas e arrestou a 3500 sen xuízo. A única resposta á atitude do PKK foi cominá-los a rendir-se incondicionalmente. O 8 de xuño seguinte, o PKK anunciou que Turquía ía sufrir o verán mais sangrento da súa historia. Cal é a tua valoración desta nova ofensiva do PKK?

A campaña do verán foi moi intensa. O goberno tivo unhas 2000 baixas só no mes pasado, entre soldados, gardas das aldeas [contra-guerrillas pagados polo goberno], policía e forzas de seguridade. En moitas zo-

nas, a guerrilla controla as montañas e as áreas rurais. O exército viu-se obrigado a abandonar os seus postos militares e a retirar-se ás cidades. A guerrilla controla as estradas, especialmente a partir do solpor. Nengun vehículo oficial pode circular por elas chegada a noite. Golpeamos severamente o sistema de *gardas da aldea*. Moitos destes gardas foron executados, por colaborar co goberno.

Onte pola noite houbo un programa na televisión turca sobre a posibilidade de facer eleicións no Kurdistan no marzo vindeiro. Había un deputado que dicía que era imposible porque o estado non ten control da zona. Isto mostra o grao de autoridade do PKK no Kurdistan: estamos a outubro, e están a debater a posibilidade das eleccións en marzo do ano que ven.

Na prensa destacou-se moito a repercusión no turismo da nosa ofensiva. Os turistas non deberían ir a Turquía. Os seus cartos financian a guerra. Desde o 1988 levamos dicendo isto. *Toda Turquía é zona de guerra, non só o Kurdistan: o PKK expandiu as súas actividades. E o ano que ven será peor. [Habería que mencionar aquí o "secuestro" dunha dúcia de turistas estranxeiros polo PKK, este verán; segundo eles propios, foron tratados como invitados, e os únicos que poñían traxas para a súa liberación era o goberno turco. En casos similares, o exército ten asasinado aos reféns do PKK para desprestixialos.]*

Vista a intransixencia do estado turco, existe algunha posibilidade real dunha solución negociada? Aceptaría o PKK unha autonomía similar á de Euskadi [cuestión debatida na tele turca eses días]?

Unha solución política é posible. É o goberno turco quen se nega a considerala. Unha solución política, baseada nunhas condicións e uns dereitos iguais para turcos e para kurdos é unha posibilidade que o PKK non rexeitará. É Turquía quen a rexeita. O goberno turco intenta convencer ao mundo, á opinión pública mundial, de que é o PKK quen é intransixente, que é o PKK quen rexeita a paz. Mas aí tendes o cesamento do fogo unilateral, aí está a vontade negociadora do PKK. Unha solución política pacífica, sempre que se basee na igualdade entre turcos e kurdos, e non na presente falta de recoñecemento dos dereitos do pobo kurdo. Nós no dicemos que sexa demasiado tarde, ou que non exista a posibilidade. Depende das autoridades turcas.

E o único xeito de cambiar a actitude do estado turco é intensificar a actividade guerrilleira, intensificar a loita militar. Só isto fará que o estado turco se pare a considerar unha solución política. ■

-O ano 1991 significou o fin da prohibición de falar kurdo en público. Esta decisión do goberno afectou en algunha medida a realidade social no Kurdistan?

-Mais que dunha decisión do goberno, sería máis apropiado falar dunha vitoria da loita popular. Mas a pesar de ter levantado a prohibición, a actitude do goberno turco non cambiou nada. Non se modificou a constituición, non hai educación en kurdo. Existen unhas cintas gravadas en kurdo, que fan o papel de escola popular. Algunha xente foi torturada por ter estas cintas. Son legais, mas... Existe un periódico semanal en kurdo, que custa moitos esforzos manter, polas ameazas do estado. Unha educación en kurdo oficial ou apoiada polo estado é algo impensable.

-Neste contexto, cal é o papel do PKK na educación ou concienciación da xente?

-Para rematar coa ocupación colonialista, a guerrilla, antes de poder programar e desenvolver unha educación kurda, ten que concienciar a xente. Nas zonas rurais non hai posibilidade de falar dunha educación propiamente dita. O PKK ás veces baixa aos povos a falar coa xente, explicar-lles a situación política, os obxectivos... Baixo un rexime colonial, baixo a ocupación, é imposible manter a cultura propia e as tradicións. Mas nas cidades, como Istambul [a cidade kurda máis grande, con tres millóns de kurdos], temos un xornal diario...

-...en kurdo...

...en turco, en turco. Hai un semanario en kurdo, e unha revista mensual kurda en ruso. En Europa, por suposto, temos máis liberdade; é máis doado difundir a cultura kurda.

.....

A guerra no Kurdistan é unha guerra sen cuartel por parte do goberno turco. É unha guerra contra toda a xente do Kurdistan. Queren converter o país nun espazo baleiro, nun ermo. Evacuaron centos de aldeas [perto de 400, segundo o Partido da Democracia (DEP)]: primeiro matan os animais, logo ameazan a xente. Non teñen opción: a maioría marchan. Se non, son asasinados: vellos, nenos, mulleres. A represión foi moi intensa, sobre todo nos últimos meses. Todos os días matan a alguén. Nas cidades, asasinan aos vendedores de *Ozgur Gundem* [xornal de Istambul, a punto de ser pechado polo goberno]. Queiman e destrúen as aldeas, incineran á xente de Diyarin e Sunduz, utilizan napalm e armas químicas nas montañas de Nurhak. É unha guerra sen cuartel contra a identidade do pobo kurdo, que xa non quer permanecer dentro das fronteiras turcas.

Mesmo a guerra en Bósnia resulta un xogo comparada co que pasa no Kurdistan.

Estas sapatillas perxudican a saúde (de quen as fabrica)

As multinacionais encontrarán sempre un país no que os salários e as prestacións sociais sexan mais baixas, para impór aos asalariados unha espiral de regresión social indefinida.

Ernest Mandel

Os falsos resultados de Stuttgart

Que país gañou realmente os Campeonatos Mundiais de Atletismo de Stuttgart? Seguramente ninguén toma a sério a supremacía dos Estados Unidos na clasificación oficial (...)

Estados Unidos é o país mais rico do mundo e ten unha poboación de 252 millóns de habitantes para escoller (...) Como se poden comparar os seus resultados cos de, por exemplo, Mozambique, que é o país mais pobre do mundo? Hai un xeito simple de facelo: comparando os puntos totais obtidos coa renda per cápita de cada país demostra-se que o éxito non depende só do tamaño da poboación, senón tamén da riqueza do país (...) Segundo esta versión, Estados Unidos caería da súa primeira posición na clasificación oficial á undécima, despois de Zámibia, Cuba, Xamaica, Namibia e Tayikistán (...)

Pero as xeralizacións son perigosas (...) e o benestar non é garantía de éxito (...) Franza nen sequera conseguiu gañar unha medalla de bronce (...) E que hai dos países superpovoados que non aparecen na clasificación porque non gañan nada? (...) Os 151 millóns de persoas do Brasil non lle permitiron conseguir unha só medalla. Há ser que o fútbol traí má sorte a todo o demais. E que hai da India? É o segundo país de maior poboación do mundo (866 millóns) e nunca ten conseguido unha medalla (...) Há ser polo críquet.

Victor Keegan (*The Guardian*, Londres, 24 de Agosto)

Fernando de Araujo, loitador polos dereitos humanos en Timor Leste, que cumpre unha condena de nove anos de cárcere por "subversión", ven de recibir un premio do Programa de Dereitos Humanos de Reebok (coñecidos fabricantes de sapatillas de deporte). O curioso desta nova é que Reebok, ao mesmo tempo, pretende ignorar a precaria situación das e dos traballadores indonésios que fabrican os seus produtos.

Indonésia, que padece un dos reximes mais brutais do planeta, é a nena mimada das multinacionais occidentais, pois é ali onde poden fabricar as súas prendas por unhas poucas pesetas. Nike, Reebok e Adidas fabrican neste país a maior parte das súas sapatillas, e Levi-Strauss os seus pantalóns, entre outras. O que en teoría debería dar-lle un pulo á economía dun dos países empobrecidos (novas fábricas, mais postos de traballo), na realidade non fai mais que prolongar e agudizar un status miserábel para as traballadoras/es.

En Indonésia, o "salário mínimo legal" é de \$1.27 por día, o segundo mais baixo de Asia despois de Bangladesh. Mas aínda así a maioría dos patróns nen se digna a pagar esa cantidade. A semana laboral supera as 50 horas, sen dereito a pagas extra. As normas de seguridade e saúde no traballo son ignoradas. Frases como "permiso por maternidade" ou "baixa por enfermidade" non teñen sentido nese país, onde un embarazo significa o despedido inmediato. Segundo a Oficina Internacional do Traballo, o 80% das traballadoras indonésias (que constitúen a inmensa maioría de toda a man de obra do sector textil) padecen malnutrición.

Desde o Decreto Ministerial 342 (1985), que permite ao exército intervir nas disputas industriais, as fábricas semellan barracas militares, cun sistema de seguridade impenetrábel, e onde calquer amago de actividade sindical prémia-se cun interrogatorio que remata con toda seguridade en tortura.

A próxima vez que pagues 10.000 pts. por un par de sapatillas, pensa no pouco que lle costa á empresa etiquetadora, e no moito que pagaron as traballadoras/es indonesias/os pola tua comodidade. **A.P.**

Carne de Museu

Afinal enteramo-nos das causas da morte do home de Bechuana, mal chamado "Negro de Banyoles", tras un informe repleto de referencias ás múltiples probas científicas ás que foron submetidos os seus restos. A causa exacta da morte foi unha "fibrose intersticial difusa do pulmón, de evolución tórpida, insidiosa e severa e de posíbel orixe parasitaria vista a ubicación habitual do home de Bechuana, [sobre esa base], puido sufrir unha afectación de posíbel orixe infecciosa (...) que rematara coa súa vida". Aínda así, o seu cadáver, disecado cual becho polos irmáns Verraux, que tiñan roubado o seu corpo na mesma noite do enterro a principios do século pasado, segue exposto no Museu Darder de Banyoles no interior dunha vitrina ao efecto. O humanitario e científico estudo, que se atreve a incluír unha cita de Martin Luther King, foi disposto polo Concello da poboación e os seus custos sufragados -e supón-se que afectos a desgravación fiscal- por General Eléctrica. **Un pouco de respecto! L.B.**

Un millón e medio de bebés morren cada ano por non seren amamentados, segundo dados da UNICEF. É dicir, un bebé cada 30 segundos. Que ten que ver Nestlé, a maior empresa de alimentos do mundo, con isto? Nestlé vende perto da metade dos alimentos para bebés do planeta, entre eles leite en pó que se utiliza para amamentar artificialmente. Nos países empobrecidos, alimentar os bebés con biberón implica moitas cousas:

- *que se pode gastar, en moitas sociedades, até a metade do soldo en leite en pó;

- *que en moitos casos o leite se dilue en demasiada água, para facé-lo durar, co que perde as súas cualidades nutritivas, e produce malnutrición;

- *en zonas con escasez de água potável (ou sexa, na maior parte da terra), a mistura produz diarrea (a maior causa de mortandade infantil no mundo), desnutrición e mesmo a morte;

- *as nais deixan de producir leite, co que non ha posíbel marcha atrás no proceso.

Os únicos beneficiários desta situación son as compañías produtoras de leite en pó.

É indubidábel que a maneira mais nutritiva, económica e hixiénica de alimentar os bebés é dar-lles de peito. Por que entón tantos mortos? E aquí entran as razóns do boicot: debido á clara relación entre o leite en pó e a mortandade infantil, a UNICEF e a Organización Mundial da Saúde (OMS) adoptaron en 1981 un *Código Internacional para a Comercialización de Substitutos do Leite Materno*, para protexer as nais e os bebés das prácticas propagandísticas destas multinacionais. Este código proíbe:

- *dar mostras gratuitas de leite en pó aos hospitais;

- *promover os seus produtos ao público e aos hospitais;

- *usar imaxes de bebés na súa propaganda;

- *promover alimentos ou bebidas infantís para bebés de menos de 4-6 meses de idade.

As etiquetas deben estar escritas nunha lingua comprensível para a nai, e deben incluír unha advertencia sanitaria. Se a nai decide usar o leite en pó, ha de facé-lo unha vez ben informada. Ante o argumento de que moitas nais, elas mesmas desnutridas, non poden amamentar os seus bebés, a realidade é que eses casos son moi raros. De todos xeitos, mais val dedicar os cartos á nutrición da nai, o que resultará mais económico para a familia, e repercutirá na saúde do bebé.

Nestlé incumpre todas as normas arriba mencionadas, xa que non teñen validez legal. Por iso a única maneira que facerlas cumprir, mentres os gobernos non lexislen a situación, é o boicot. O primeiro boicot internacional tivera tal éxito, que Nestlé prometera ater-se ás normas do *Código Internacional* en 1984. Catro anos despois, após comprobar que seguía violando-o, relanzou-se unha nova campaña de boicot. Para evitar que as multinacionais enriquezan a base de mortos, invitamos-te a colaborar no boicot, non comprando nengun produto da marca Nestlé (Nescafé, Milky Bar, Chambourcy, cosméticos como L'Oreal, e centos mais).

Ultima nova: Nestlé anunciou o próximo lanzamento dun produto para combater a diarrea. Primeiro a provocan, e logo pretenden sacar beneficio da mesma enfermidade. **A.P.**



CAMPAÑA DE BOICOT A NESTLÉ

Eelam Tamil e a autodeterminación

A democracia en Sri Lanka, como en tantas partes do planeta, é un insulto á palabra Democracia. A oposición non pode expresarse por meio da prensa; o presidente ten uns poderes extraordinarios incompatibles co sistema democrático; o presidente posúe cartas de dimisión, sen data, dos membros do poder xudicial; o presidente despreza publicamente as vidas e as opinións dun sector do seu electorado; detencións arbitrarias e sen dereito a un avogado; tortura sistemática dos detidos; lei antiterrorista que permite manter os prisioneiros incomunicados durante un período de até 18 meses, algo inadmisível en calquer outra democracia...

Neste contexto, o **povo tamil**, 3 millóns de persoas que habitan o nordeste da illa, levan sofrendo máis de cuarenta anos de opresión e odio racial por parte da maioría sinhala. Esta tensión estalara os días 25 e 27 de xullo de 1983, nuns ataques ben planeados e nos que até mesmo participaron membros das forzas de seguridade, como recoñece o propio goberno sinhala. Estes ataques saldaron-se coa morte de 53 tamils que se encontraban nunha prisión de alta seguridade, e centos de outros apaleados e torturados mentres saqueaban e destruían as súas casas. Ese mesmo ano, a *Comisión Internacional de Xuristas* condenou os ataques. No primeiro aniversario da masacre, máis de 100 deputados británicos solicitaron a apertura de unha investigación. Hoxe, dez anos despois, os feitos seguen sen se aclarar.

Nos últimos anos, uns 6000 tamils foron asasinados. A violencia dos **Tigres de Liberación de Eelam Tamil** é unha resposta ante o xenocidio e a represión política. En febreiro de 1993, na 49 sesión da comisión de Dereitos Humanos da ONU en Xenebra, 15 organizacións non gubernamentais (ONGs) recoñeceron o dereito do povo tamil á autodeterminación, e a lexítima loita dos Tigres de Liberación. Algúns gobernos, como o suízo, ofrecéronse a mediar no conflito; unha misión canadiana de dereitos humanos, integrada por deputados, líderes relixiosos, un avogado e un xornalista, tamén intentou mediar. Todos foron rexeitados polo goberno de Sri Lanka, un goberno intransixente, que proíbe até o transporte de alimentos ás zonas controladas pola guerrilla, e que segue a bombardear indiscriminadamente as aldeas tamils. A.P.

1

Cando hai uns meses, durante os derradeiros días do Goberno Bush no poder dos EUA, se decide a intervención con fins humanitarios no chamado Corno de África, Somália, a opinión pública mundial celebraba alborozada unha decisión que, a simples vista, remataría cunha situación social infame nun país que estaba, literalmente, ao borde da inanición, ao mesmo tempo que acorralado por numerosos e escuros señores da guerra, enfrentados nunha sangrenta guerra civil.

O fondo descoñecemento da situación real do estado, ao que non é alleo o desprezo (unido como a merda á unlla á ignorancia) aos chamados países terceiro mundistas, facilitaba que a solución militar supeditase sen nengun tipo de dificultade a outro tipo de solucións -vias pacíficas- que tiveran máis que ver cun desenvolvemento integral -estruturas económicas, infraestruturas e sociais- do país.

Non pretendemos aquí, non obstante, dilucidar cais serían esas vías de solución pacíficas, aínda que non é necesario ser unha autoridade na materia para reclamar, máis unha vez, a responsabilidade dos países occidentais e das principais potencias capitalistas nos numerosos problemas do terceiro mundo.

Unha sociedade que na súa opulencia, cansada de observar atentamente o seu embigo, perturbada sen dúbida nengunha por agobiantes e agudos problemas de conciencia, necesita, sen demasiada frecuencia, ollo, facer acto de contrición e repaso dos pecados para ter asegurado un currunchito no ceo dos xustos e non cair definitivamente no escuro e tenebroso pozo do consumismo puro e duro e na pura e dura exploración. É perigoso continuar indefinidamente coa lei da selva nun mundo que se gaba de ter conseguido coa civilización as máis altas cotas da ética nas súas normas sociais -a hipocrésia social levada á perfeición?

É obvio que ás veces resulta rentábel destapar a pota na que se agachan cuidadosamente todas esas cousas tan feas como a miséria, a fame, a enfermidade... que tan lonxe quedan de nós (a indixencia que, incomodamente, ocupa similar espazo da sociedade da que falamos, está baixo control en tanto as forzas de seguridade cuiden de nós). Cousas tan feas, aderezadas con ese barbarismo que, como todo o mundo sabe, caracteriza os países africanos, e de paso os árabes, grande parte dos asiáticos e, como non, os conflitos latinoamericanos.

Enviar un fado de aguerridos e benintencionados *soldaditos* coas precisas intencións de alimentar ás hordas de negritos famélicos -comerán polas boas ou polas más- evita moitas dores de cabeza: é a aspirina que mellor calma a conciencia. Mas, ollo! serán os motivos que impulsan á nosa fada madrín favorita, a concienciada USA, os mesmos que alimentaron a demanda na sociedade occidental -a protagonista do noso relato- da xa perpetrada intervención militar?